

تَبَرَاتْ إِرْوَارَنْ نْ يُوَحَنَّا

1

إِفْرُ إِرْوَارَنْ

¹ وَلِيَّ يِلَانْ غَمَنْ إِسْ إِرْوَورْ، وَلِيَّ مْ نَسَقْلَدْ، وَلِيَّ نَزْرَا سْ وَالَنْ نَخْ، وَلِيَّغْ نَسْمُوقْلْ نَكْرُ أَسْ سْ إِفَاسَنْ نَخْ، إِكْ أَوَالْ نْ تُوْدِرْتْ، نَتَّانْ أَفَإْيُونِيْنْ نَتَّارَا. ² تُوْدِرْتْ أَدْ تَبَايَنْدْ نَزْرْتْ، أَرْ فَلَاسْ نَكَا تُوْكَأْ أَرَاوَنْ نَسْوَالْ فْ تُوْدِرْتْ إِدَاوَمَنْ لِيَّ سَتِّيْنْ إِكَّانْ دَارْ بَابَاتْنَخْ تَبَايَنْ أَخْذْ غِلَادْ. ³ أَيْلِيَّ نَزْرَا نَسَقْلَدْ أَسْ أَفْ أَيْوَنْ نَسْوَالْ، فَادِيدَنْخْ تَمُونْ أَلَا كَنِيَّ غَمَكْلِيَّ نُمُونْ نَكْنِيَّ دْ بَابَاتْنَخْ دْ يِوَسْ يَسُوعْ لَمَسِيحْ. ⁴ أَرْ أُوْنِيْنْ نَتَّارَا مِيَادْ فْ أَيْكْ لَفَرْحْ نُونْ وَادْ إِكْمَلَنْ.

⁵ خَتَادْ أَيْكَانْ تَبَرَاتْ لِيَّ مْ نَسَقْلَدْ غْ دَارْ لَمَسِيحْ أَرَاوْنِيْنْ نَكَا لَآخْبَارْ نَسْ: رَبِّيَّ إِكَا تَفَاوَتْ أَوْرْ كَيْسْ حَتَّا إِمِيَكْ نْ تِلَاسْ. ⁶ إِغْ أَنتِّي: نُمُونْ دِيدَسْ أَرْ سُولْ نَزْكَيْزْ غْ تِلَاسْ، هَانْ أَرْ نَسْكُرْكِيسْ أَوْرَا نَسْكَارْ سْ لَحَقْ. ⁷ وَلَايْنِيَّ إِغْ أَنْزْكَيْزْ غْ تَفَاوَتْ غَمَكْلِيَّ يِلَا غْ تَفَاوَتْ، هَانْ نُمُونْ دْ إِنْكَرَاتْنَخْ، أَرَاخْ سَخُوسَنْ إِدَامَنْ نْ يِوَسْ يَسُوعْ لَمَسِيحْ غْ كَرِيْكَاتْ دَنْوْبْ. ⁸ إِغْ أَنتِّي: أَوْرْ كَيْنَخْ دَنْوْبْ هَانْ نَطْنَزْ غْ إِخْفْ نَخْ أَوْرْ كَيْنَخْ إِلِيَّ لَحَقْ. ⁹ وَلَايْنِيَّ إِغْ نَقْرَا سْ دَنْوْبْ نَخْ هَانْ رَبِّيَّ إِلَا كَيْسْ لَامَانْ أَرْ إِتْحَكَامْ سْ لَحَقْ، رَا دَاخْ إِغْفَرْ دَنْوْبْ نَخْ إِسْغُوسَاخْ غْ كَرِيْكَاتْ كَارْ. ¹⁰ إِغْ نَنَّا: أَوْرْ نَسْكُرْ دَنْوْبْ هَانْ نَكَا رَبِّيَّ دْ وَادْ إِسْكُرْكِيسَنْ، دْ وَوَالْ نَسْ أَوْرْ كَيْنَخْ إِلِيَّ.

2

إِفْرُ وِيسْ سِينْ

¹ أَرْ أُوْنِيْنْ تَرَاخْ أَتْرُوَا نُو مِيَادْ فَادْ أَوْرْ تَعَصُومْ. إِغْ إِسْكُرْ كَرَا نْ يَانْ كُتُونْ كَرَا نْ لَمْعَصِيْتْ هَانْ إِلَا دَارْنَخْ أَشْفِيْعْ غْ دَارْ بَابَاتْنَخْ، أَتْ إِكَّانْ دْ يَسُوعْ لَمَسِيحْ لِيَّ إِرْكَانْ. ² نَتَّانْ أَيْكَانْ لَكْفَارْتْ فْ دَنْوْبْ نَخْ. أَوْرْ دْ دَنْوْبْ نَخْ كَا، وَلَايْنِيَّ أَلَا وِينْ أَيْتْ دُونِيْتْ كَلُوتَنْ.

³ مِيَادْ أَسْ نَتِّيْسَانْ إِسْتْ نَسْ: إِغْ أُنَسْكَارْ سْ لُوصِيَّاتْ نَسْ. ⁴ وَنَا إِتْنِيْنْ: «سَتْنَخْتْ» أَوْرْ أَيْسْكَارْ سْ لُوصِيَّاتْ نَسْ، هَانْ أَرْ إِسْكُرْكِيسْ أَوْرْ كَيْسْ إِلِيَّ لَحَقْ. ⁵ وَنَا إِسْكَارَنْ سْ وَوَالْ نَسْ، هَانْ تَايْرِي نْ رَبِّيَّ تَكَا كَيْسْ تَادْ إِكْمَلَنْ. مِيَادْ أَسْ نَتِّيْسَانْ إِسْ كَيْسْ نَكَا: ⁶ وَنَا إِتْنِيْنْ: إِتْغِيَّ كَيْسْ إِلَا فَلَاسْ أَيْسْكَارْ غَمَكْلِيَّ يِسْكَارْ. ⁷ أَوْرْ دْ لُوصِيْتْ لَجْدِيْذْ أَدَاوْنِيْنْ تَرَاخْ أَيْيْتْمَا، وَلَايْنِيَّ لُوصِيْتْ تَقْدِيْمْتْ لِيَّ دَرُونْ إِلَانْ غَمَنْ إِسْ إِرْوَورْ أَدْ أُوْنِيْنْ تَرَاخْ. لُوصِيْتْ أَدْ تَقْدِيْمْتْ إِكَاتْ وَوَالْ لِيَّ مْ نَسَقْلَدْ غَمَنْ إِسْ إِرْوَارْ. ⁸ أَرْ أُوْنِيْنْ دَاخْ تَرَاخْ

يَاتْ لُوصِيْتْ لَجْدِيْدْ تَصْحُوْ كَيْسْ نَتَّانْ، تَصْحُوْ كِيُوْنْ أَلَا كَنِّيْ أَشْكُوْ تَلَّاسْ أَرْتَنْتْ تَلَّاحْ تَفَاوْتْ إِحْقَاقَنْ أُرْ
تَسُوْفُوْ غِلَادْ. ⁹ وَنَا إِيْتْنِيْنْ: إِلَّا غْ تَفَاوْتْ وَلَايْنِيْ إِحْسَا كَمَّاسْ، هَانَ إِلَّا أَكَانْ سُوْلْ غْ تَلَّاسْ. ¹⁰ وَنَا إِحُوْبَانْ
كَمَّاسْ هَانَ تَفَاوْتْ أَعْ إِلَّا أُوْرْ إِلِّيْ كَرَا نْ مَارَادْ أَسْ إَزَلْ. ¹¹ وَلَايْنِيْ وَنَا إِحْسَانَ كَمَّاسْ هَانَ تَلَّاسْ أَعْ إِلَّا،
أُرْ إِسْدُلُوْفُوْ غْ تَلَّاسْ، أُوْرْ إِسْنْ مَنِيْ سْ إِدَا، أَشْكُوْ سَبُوْكَضَنْتْ تَلَّاسْ.

¹² أَرَاوْنِيْنْ تَرَاخْ أَتْرُوَا نُو، أَشْكُوْ رَبِّيْ إَغْفَرْ أُوْنْ دَنُوْبْ نُوْنْ فْ أُوْدَمْ نْ لَمْسِيْحْ. ¹³ أَرَاوْنِيْنْ تَرَاخْ
أَيْفَقِيْرَنْ، أَشْكُوْ تَسْنَمْ وَلِيْ يِلَّانْ غَمْنْ إِسْ إَزُوْرُوْرْ. أَرَاوْنِيْنْ تَرَاخْ أَيْعَزْرِيْنْ، أَشْكُوْ تَتْرَامْ إِيْلِيْسْ. أَرَاوْنِيْنْ
تَرَاخْ أَتْرُوَا، أَشْكُوْ تَسْنَمْ بَابَاتْنَخْ. ¹⁴ أَرِيْخْ أُوْنِيْنْ أَيْفَقِيْرَنْ، أَشْكُوْ تَسْنَمْ وَلِيْ يِلَّانْ غَمْنْ إِسْ إَزُوَارْ. أَرَاخْ
أُوْنِيْنْ أَيْعَزْرِيْنْ، أَشْكُوْ تَدُوْسَمْ، إِتْغِيْ كِيُوْنْ وَوَالْ نْ رَبِّيْ، تَكَمْ فْ إِيْلِيْسْ.

¹⁵ أَذْ أُوْرْ تَحُوْبُوْمْ دُونِيْتْ أَلَا تَغُوْسُوِيْنْ لِيْ كَيْسْ لَانِيْنْ. هَانَ يَانَ إِحُوْبَانْ دُونِيْتْ أُوْرْ كَيْسْ تَلِّيْ تَايْرِيْ نْ
بَابَاتْنَخْ. ¹⁶ أَشْكُوْ أَيْلِيْ كَلُوْ إِلَّانْ غْ دُونِيْتْ نْ شَهَوَاتْ نْ دَاتْ تِيْنْ وَالَنْ، دْ أَيْلِيْ سْ إِكَابَرْ يَانَ نْ وَيْدَا، أُوْرْدْ
إِكِيْ دَارْ بَابَاتْنَخْ وَلَايْنِيْ دُونِيْتْ أَذْ إِكَا. ¹⁷ دُونِيْتْ رَاتْرَرْيْ نَتَاتْ أَلَا شَهَوَاتْ نَسْ، وَلَايْنِيْ وَلِيْ يَسْكَارَنْ أَيْلِيْ
يِرَا رَبِّيْ رَا بَدَا إِدَرْ.

¹⁸ هَانَ أَتْرُوَا تَسَاعَتْ إَكْرَانَ أَيْادْ. تَسَقْلَدَمْ إِسْ رَادْ يَاشْكَ وَلِيْ يَغَانَ ضِيْضْ نْ لَمْسِيْحْ، غِلَادْ لَانَ كِيْغَانَ
نْ وَلِيْ كَنِيْنْ ضِيْضْ نْ لَمْسِيْحْ. مِيَادْ أَيْخْ إِمَّالَنْ إَزْدْ تَسَاعَتْ إَكْرَانَ أَيْادْ. ¹⁹ دَارْنَخْ أَعَنْ فُوْغَنْ، وَلَايْنِيْ أُوْرْ
كِيْنَخْ كِيْنْ، أَشْكُوْ مَلَادْ إِسْ كِيْنَخْ كَانْ سْ دِيْدْنَخْ غَمَّانْ. وَلَايْنِيْ بَضَانَ دِيْدْنَخْ، فَاذَاخْدْ إِيَابِيْنْ إِسْ كِيْنَخْ أُوْرْ
إِكِيْ حَتَّا يَانَ كِيْتَسَنْ. ²⁰ وَلَايْنِيْ كَنِّيْ إَزْغَرَكَنْ لَمْسِيْحْ لِيْ يَغَانَ لَقْدُوْسْ إِسْتِيْكَنْ سْ رُوْحْ لَقْدُسْ تِيْسَانَمْ كَلُوْكَنْ
لَحَقْ. ²¹ أُوْرْدْ أَفْ أُوْنِيْنْ أَرِيْخْ دْ إِسْ أُوْرْ تَسْنَمْ لَحَقْ، وَلَايْنِيْ أَفَاوْنِيْنْ أَرِيْخْ دْ إِسْتْ تَسْنَمْ، أَشْكُوْ أُوْرْ لِيْنْ
إِكْرَكَاسْ لِيْدْ تَشْكَنِيْنْ غْ لَحَقْ. ²² مَانُوا إِكَانَ بُوْيَكْرَكَاسْ، أَبَلَا وَلِيْ يِتْتَكَارَنْ إَزْدْ يَسُوْعْ أَيْكَانْ لَمْسِيْحْ؟ غَوَادْ
أَيْكَانْ ضِيْضْ نْ لَمْسِيْحْ، وَلِيْ يِتْتَكَارَنْ بَابَاتْنَخْ دْ يُوْسْ. ²³ وَنَا إِيْنَاكَرَنْ أَرَاوْ نْ بَابَاتْنَخْ أُوْرْ يُوْفِيْ بَابَاتْنَخْ أَلَا
نَتَّانْ، وَنَا إِفْرَانَ سْ وَرَاوْ نْ بَابَاتْنَخْ هَانَ إِلَّا دَارَسْ بَابَاتْنَخْ أَلَا نَتَّانْ.

²⁴ أَمَّا كَنِّيْ أَكِيُوْنْ إِتْغِيْ أَيْلِيْ مْ تَسَقْلَدَمْ غَمْنْ إِسْ إَزُوْرُوْرْ. أَشْكُوْ إَغْ كِيُوْنْ إِتْغِيْ أَيْلِيْ مْ تَسَقْلَدَمْ غَمْنْ إِسْ
إَزُوْرُوْرْ، هَتِيْ رَادْ تَغِيْمْ أَلَا كَنِّيْ غْ وَرَاوْ نْ بَابَاتْنَخْ تَغِيْمْ غْ بَابَاتْنَخْ. ²⁵ أَشْكُوْ غَوَادْ أَيْكَانْ لَقَوْلْ لِيْ سَاخْ
إِقَاوْلْ: أَتْ إِكَانَ دْ تُوْدَرْتْ إِدُوْمَنْ. ²⁶ أَرَاوْنِيْنْ تَرَاخْ مِيَادْ فْ وَلِيْ سِيْغِيْلِيْنْ أَكَنْ جَلُوْنْ. ²⁷ أَمَّا كَنِّيْ، لَمْسِيْحْ
إِفْكَايُوْنْ رُوْحْ نَسْ. إَغْ كِيُوْنْ إِغْمَا رُوْحْ نَسْ أُوْرْ سُوْلْ تَحْتَجَامْ مَآكَنْ إِسْلَمَادَنْ. أَشْكُوْ رُوْحْ رَادَاوَنْ إِمَّالْ
كَرِيْكَاتْ تَغُوْسَا، أَيْلِيْ يَاوَنْ إِمَّالْ إِصْحَا، أُوْرْ إِكِيْ إِكْرَكَاسْ. غَانَ أَفْ إِخْصَا أَتْسَقْلِيْدَمْ سْ أَيْلِيْ يَاوَنْ إِمَّالْ
تَمُوْنَمْ بَدَا دْ لَمْسِيْحْ.

²⁸ غَلَاذَ اَتَرُوا تَغِي يَاتْ غَ لَمْسِيحْ، بَاشْ اَكُوذْ نَادْ اِبَايْنِ اُنْبِتْ نَزْعَمْ، اُورْ نِحْشَامْ اِيْخَفْ نَخْ كُوْدْنَادْ يُوْشْكَا.
²⁹ اِغْ تَسْنَمْ اِسْ اِگَا لَحَقْ، اِسْنَاتْ اِزْدْ كُولْ مَائِسْكَارَنْ سْ لَحَقْ اِسْ اِگَا يُوْسْ.

3

اِفْرُ وِيسْ كَرَاَضْ

¹ زَرَاتْ مُنْشَكْ اَسْ تَكُوْتْ تَايْرِي لِي سَاخْ اِرا رَبِّي بَابَاتْنَخْ اِيلِيْغْ اَخْ اِگَا تَرُوا نَسْ! غَانَ اَفْ اَخْ اُورْ سَنْ اَيْتْ دُونِيْتْ، اَشْكُو اُورْتْ سَنْ. ² غَلَاذَ اَيْيْتَمَا عَزَانِيْنْ نِگَا تَرُوا نْ رَبِّي، وَلَايْنِي اُورْتَادْ اِبَايْنِ مَارَانْگْ غَ مَادْ اِكَانْ لُگْدَامْ. وَلَايْنِي نَسَنْ اِزْدْ اِغْدْ اِبَايْنِ لَمْسِيحْ اِسْ رَانْگْ زُونْدْ نَسْ، اَشْكُو رَاتْ نَزَرْ غَمْكَلِي يِگَا. ³ كُولْ مَادَارْ گِيسْ اِلَا رَجَا يَادْ، اُرْ اِسْغُوسْ اِخَفْ نَسْ غَمْكَلِي يَغُوسْ نَتَانْ. ⁴ وَنَا اِسْكَرَنْ كَرَا نْ دَنْبْ، هَانَ اِرْژَا شَرْعْ نْ رَبِّي، اَشْكُو دَنْبْ اِگَاتْ اِغْ اِرْژَا يَانَ شَرْعْ. ⁵ وَلَايْنِي تَسْنَمْ اِزْدْ اَفْدْ اِبَايْنِ لَمْسِيحْ دْ اَيْسِي دَنْوْبْ نَخْ، نَتَانْ لِيْغْ اُورْ لِيْنْ كَرَا نْ دَنْوْبْ. ⁶ وَنَا گِيسْ اِتْغِيْنِ اُورْ اَيْتْغُصُو. وَنَا اِتْغُصُونْ هَانَ اُورْتْ اِزْرِي اِلَا اِسْتَنْتْ.

⁷ اَكَنْ اُورْ اِجْلُو يَانَ اَتَرُوا: وَنَا اِسْكَارَنْ سْ لَحَقْ هَانَ وَادْ اِصْلَحَنْ اِيْگَا، غَمْكَلِي يِگَا لَمْسِيحْ لَحَقْ. ⁸ وَنَا اِتْغُصُونْ هَانَ اِبْلِيْسْ اَغْ اِگَا، اَشْكُو اِبْلِيْسْ غَمْنِ اِسْ اِزْوُورْ اَيْتْغُصُو. غَانَ اَفْدْ اِبَايْنِ يُوْسْ نْ رَبِّي، اِبَايْنِذْ فْ اِيْخْلُو اِيلِيْ يِسْكَرْ اِبْلِيْسْ. ⁹ كُولْ مَادْ اِلَوْلَانْ غَ دَارْ رَبِّي اُورا اِتْغُصُو، اَشْكُو اُمُوْدْ نْ رَبِّي اُرْگِيسْ اِتْغَايْ، اُورْ اِزْضَارْ اَيْتْغُصُو اَشْكُو اِلَوْلَادْ غَ دَارْ رَبِّي. ¹⁰ مِيَادْ اَسْ نَتْسَانْ تَرُوا نْ رَبِّي دْ تَرُوا نْ اِبْلِيْسْ: كُولْ مَا اُورْ اِسْكَارَنْ سْ لَحَقْ، هَانَ اُورْ اِگِي وِينْ رَبِّي، غَمْكَانْ دْ وَنَا دَارْ اُورْ اِعْزِي گَمَاسْ. ¹¹ اَشْكُو خَتَادْ اِيْگَانْ تَبَرَاتْ لِي مْ تَسْقَلْدَمْ غَمْنِ اِسْ اِزْوُورْ: اَنْحُوْبُو اِنْگَرَاتْنَخْ. ¹² اَدْ اُورْ تَكْمْ زُونْدْ قَايِيْنِ لِي يِگَانْ وِينْ اِبْلِيْسْ اِغْرُصْ اِگَمَاسْ. مَاخْ اَدَاسْ اِغْرُصْ؟ اَشْكُو لَافْعَالْ نَسْ گَانْ وِينْ گَارْ، كَنْ لَافْعَالْ نْ گَمَاسْ وِينْ لَحَقْ.

¹³ اَدْ اُورْ تَعَجَابَمْ اَيْيْتَمَا اِغْكَنْ حَشَانْ اَيْتْ دُونِيْتْ. ¹⁴ نَكْنِي نَسَنْ اِسْ نَزْكَرْ غَ لَمُوْتْ سْ تُوْدِرْتْ، اَشْكُو اُرْ نَتْحُوْبُو اَيْيْتَمَاتْنَخْ. وَنَا اُورْ اِتْحُوْبُونْ گَمَاسْ هَانَ اِغْمَا اُوْكَانْ سُولْ غَ لَمُوْتْ. ¹⁵ وَنَا اِحْشَانْ گَمَاسْ هَانَ اِگَا اِمْنُغِي، كْنِي تَسْنَمْ اِزْدْ وَنَا اِگَانْ اِمْنُغِي اِسْ دَارَسْ اُورْ تَلِي تُوْدِرْتْ اِدُومَنْ. ¹⁶ غَمْكَادْ اَسْ نَتِيْسَانْ تَايْرِي: اُرْتْ نَتِيْسَانْ سْ غَمْكَلِي فَلَاحْ اِسْبَلْ لَمْسِيحْ اِخَفْ نَسْ، غَمْكَانْ دْ نَكْنِي اِلَا فَلَاحْ اَنْسَبَلْ اِخْفَاوَنْ نَخْ فْ اَيْيْتَمَاتْنَخْ. ¹⁷ اِغْ اِلَا وِيْدَا نْ دُونِيْتْ دَارْ كَرَا نْ يَانَ، اُرْ اِسْمَقُولْ گَمَاسْ اِلْكَمْ فَلَاسْ، سُولْ اُورْ گِيسْ اِحْنِي مَمْنُكْ اَسْ رَاگِيسْ تَغِي تَايْرِي نْ رَبِّي؟ ¹⁸ اَكَا اُورْ نَتْحُوْبُو اَتَرُوا نُو سْ اُولِيُونْ دْ اِمِي، وَلَايْنِي اِلَا فَلَاحْ اَنْتْحُوْبُو سْ لَافْعَالْ دْ لَحَقْ. ¹⁹ غَمْكَادْ اَسْ نَتِيْسَانْ اِسْ نِگَا غَ لَحَقْ، بِلِي وُولْ نَخْ غَ لَهْنَا غَ اُمْنِيْذْ نْ رَبِّي. ²⁰ اَشْكُو اِغْ اِيْخْ طَرْيِيْنْ اُولَاوَنْ نَخْ، هَانَ رَبِّي يُوْكَرْ اُولَاوَنْ نَخْ، نَتَانْ اَيْسَنْ كَرِيْگَاتْ.

²¹ إغْ أَيْخْ أُوْر طَّرِينْ أُولَاوْنْ نَخْ أَيْيْتَمَا عَزَانِينْ، هَانْ نَزْعَمْ غْ أُمْنِيدْ نْ رَبِّي. ²² أَرَاخْ يَكَا كُولْ مَايسْ نَضَالْبْ، أَشْكُو أَرْنَسْكَارْ سْ لُوصِيَّاتْ نَسْ، أَرْنَسْكَارْ أَيْلِيْ فْ إِرْضَا. ²³ خَتَادْ أَيْكَانْ لُوصِيَّاتْ نَسْ: أَنَامَنْ سْ إِسْمْ نْ يِوسْ يَسُوعْ لَمْسِيحْ، أَرْنَتَحُوبُوْ إِنْكَرَاتْنَخْ غَمَكْلِيْ فَاخْ يُوَصَّا. ²⁴ وَنَا إِسْكَارَنْ سْ لُوصِيَّاتْ نَسْ، رَا يَنْغِيْ غْ رَبِّيْ إِتْغِيْ كَيْسْ رَبِّيْ. دْ غَمَكَادْ أَسْ نَنْتِيْسَانْ إِسْ كِيْنَخْ إِتْغِيْ: أَرْتْ نَنْتِيْسَانْ سْ رُوحْ لَقْدُسْ لِيْ يَاخْ إِفْكََا.

4

إِفْرْ وِيسْ كُوْثْ

¹ أُوْرْدْ أَيْيْتَمَا عَزَانِينْ وَنَايُونْ كَا يِنَانْ إِلَّا كَيْسْ رُوحْ نْ رَبِّيْ تَامْنَمْتْ نِيْتْ، وَلَايْنِيْ تَرَمَاتْنْ أَيْيْسَانَمْ: إِرْدْ دَارْ رَبِّيْ أَدْ إِكَا رُوحْ لِيْ كَيْسْنْ، أَشْكُو كِيْكَانْ دْ لَانِيَّيَا نْ زُورْ أَدْ إِفْغَنْ سْ دُونِيْتْ. ² غَمَكَادْ أَسْ تِيْسَانَمْ وَنَا غْ إِلَّا رُوحْ نْ رَبِّيْ: كَرِيْكَاتْ يَانْ نَا إِنْقَرُونْ إِسْدْ يُوْشْكََا يَسُوعْ لَمْسِيحْ فْ صَفْتْ نْ أْفْكَانْ، هَانْ رُوحْ لِيْ كَيْسْ دَارْ رَبِّيْ أَدْ إِكَا، ³ كَرِيْكَاتْ يَانْ نَا أُوْرْ إِنْقَرُونْ إِسْدْ يُوْشْكََا يَسُوعْ لَمْسِيحْ فْ صَفْتْ نْ أْفْكَانْ هَانْ رُوحْ لِيْ كَيْسْ أُوْرْدْ دَارْ رَبِّيْ أَدْ إِكَا. غُوَانْ أَيْكَانْ ضِيْضْ نْ لَمْسِيحْ لِيْ فْ تَسْقَلْدَمْ إِسْ رَادْ يَاشْكَ، غِلَادْ هَتِيْ إِلَّا غْ دُونِيْتْ. ⁴ كْنِيْ أَتْرُوَا وِينْ رَبِّيْ أَتْكَامْ، تَنْرَامْتَنْ أَشْكُو وَلِيْ كِيُونْ إِلَانْ يُوْكَرْ وَلِيْ يِلَانْ غْ دُونِيْتْ. ⁵ نَنْتِيْ كَانْ وِينْ دُونِيْتْ. أَرْ سَوَالْنْ أَوَالْ نْ أَيْتْ دُونِيْتْ، غَانْ أَفْ أَيْسَنْ سَقْلِيدَنْ أَيْتْ دُونِيْتْ. ⁶ نَكْنِيْ نَكَا وِينْ رَبِّيْ. وَنَا إِسْنْ رَبِّيْ رَادَاخْ إِسْقَلِيدْ، وَنَا أُوْرْ إِكِيْنْ وِينْ رَبِّيْ أُوْرَايْنَخْ إِسْقَلِيدْ. غَمَكَادْ أَسْ أَنْتِيْسَانْ رُوحْ نْ لُحَقْ دْ رُوحْ نْ تَكَرْكَاسْ.

⁷ حُوبُوْيتَاخْ إِنْكَرَاتْنَخْ أَيْيْتَمَا عَزَانِينْ، أَشْكُو تَايْرِيْ دَارْ رَبِّيْ أَدْ تَكَا، وَنَا إِتْحُبُونْ هَانْ إِلُولَادْ غْ دَارْ رَبِّيْ يِيْسَانْ رَبِّيْ. ⁸ وَنَا أُوْرْ إِتْحُبُونْ هَانْ أُوْرْ إِسْنْ رَبِّيْ، أَشْكُو تَايْرِيْ أَيْكََا رَبِّيْ. ⁹ غَمَكَادْ أَسْ أَخْدْ إِسْبَايْنْ رَبِّيْ تَايْرِيْ نَسْ: لِيْغْدْ يُوْزَنْ يِوسْ لِيْ دَارْسْ إِكَا يَانْ سْ دُونِيْتْ فْ أَسْرُسْ نَدْرْ. ¹⁰ خَتَادْ أَيْكَانْ تَايْرِيْ: أُوْرْدْ نَكْنِيْ أَيْحُوبَاَنْ رَبِّيْ، وَلَايْنِيْ نَتَانْ أَدَاخْ إِحُوبَاَنْ، يَارَنْدْ يِوسْ إِكْ لَكْفَارْتْ فْ دُنُوبْ نَخْ.

¹¹ لِيْغْ أَخْ إِحُوبَاَنْ رَبِّيْ سْ غُونْشْكَادْ أَيْيْتَمَا عَزَانِينْ، هِيْ إِلَّا فَلَاحْ أَلَا نَكْنِيْ أَنْحُوبُوْ إِنْكَرَاتْنَخْ. ¹² رَبِّيْ أُوْرْ جُونْتْ إِزْرِيْ يَانْ. وَلَايْنِيْ إِغْ نَحُوبَاَنْ إِنْكَرَاتْنَخْ هَانْ رَاكِيْنَخْ إِتْغِيْ رَبِّيْ، تَكْ كِيْنَخْ تَايْرِيْ نَسْ تَادْ إِكْمَلَنْ. ¹³ مِيَادْ أَسْ نَسْنْ إِسْ كَيْسْ نَنْغِيْ إِتْغِيْ كِيْنَخْ: أَشْكُو إِفْكَايَاخْ غْ رُوحْ نَسْ. ¹⁴ نَكْنِيْ نَزْرَا أَرْ نَكَا تُوْكََا إِسْدْ يُوْزَنْ بَابَاتْنَخْ يِوسْ أَيْكَ وَلِيْ رَايْجَنْجَمْ مَدَنْ. ¹⁵ وَنَا إِفْرَانْ إِسْ إِكَا يَسُوعْ يِوسْ نْ رَبِّيْ، هَانْ رَاكِيْسْ إِتْغِيْ رَبِّيْ، إِتْغِيْ أَلَا نَتَانْ غْ رَبِّيْ. ¹⁶ نَكْنِيْ نَسْنْ نَامَنْ تَايْرِيْ لِيْ سَاخْ إِحُوبَاَنْ رَبِّيْ. رَبِّيْ إِكَا تَايْرِيْ، وَنَا إِتْغِيْنْ غْ تَايْرِيْ، هَانْ إِتْغِيْ غْ رَبِّيْ إِتْغِيْ كَيْسْ رَبِّيْ. ¹⁷ غَمَكَادْ أَسْ أَكِيْنَخْ تَكَا تَايْرِيْ تَادْ إِكْمَلَنْ: أَدَارْنَخْ تَلِيْ زَعْمْتْ غْ وَاسْ نْ لُحْسَابْ، أَشْكُو غَمَكْلِيْ يِكَا لَمْسِيحْ غْ دُونِيْتْ أَدْ، أَكِيْسْ نَكَا أَلَا نَكْنِيْ. ¹⁸ تَايْرِيْ أُوْرْ كَيْسْ لِيْنْتْ

تَكْصَّاضْ، وَلَايْنِي تَايِرِي إِكْمَلْنْ أَرْتَطَاي تَكْصَّاضْ سَ بَرَا. أَشْكُو تَكْصَّاضْ أَرْدُ تَشْكَانْتْ غَ لَعَابْ، وَنَا إِكْصُوضْنْ هَانْ أُوْرْ تَكْمَلْ تَايِرِي نَسْ. ¹⁹ نَكْنِي أَرْتْ نَتَّحُوبُو أَشْكُو إِرْوَارْ إِسَاخْ إُحُوبَا. ²⁰ وَنَا إِيْتَيْنْ: «نَكْنِي حُوبِيخْ رَبِّي» إِحْشَا كَمَاسْ، هَانْ أَرْ إِسْكَرْكِيسْ. أَشْكُو وَنَا أُوْرْ إُحُوبَيْنْ كَمَاسْ لِي يِيْتَنَاي، مَمْنَكْ أَسْ إِرْضَارْ أَيْحُوبُو رَبِّي لِي أُوْرْ إِيْتَنَاي؟ ²¹ لُوصِيْتْ أَدْ أَدَاخْ إِفْكََا: وَنَا إُحُوبَانْ رَبِّي، إِيْلَا فَلَاسْ أَيْحُوبُو كَمَاسْ أَلَا نَتَّانْ.

5

إِفْرُ وِيسْ سَمُوسْ

¹ وَنَا يُومَنْ إِرْدُ يَسُوعْ أَيْكَانْ لَمْسِيخْ هَانْ إِيْلَوْلَادْ غَ دَارْ رَبِّي. دُ وَنَا إُحُوبَانْ بَابَاسْ نْ تَرَوَا هَانْ إُحُوبَا تَرَوَا نَسْ أَلَا نَتَّي. ² غَمْكَادْ أَسْ نَتِّيَسَانْ إِسْ نُحُوبَا تَرَوَا نْ رَبِّي: أَرْتْ نَتِّيَسَانْ إِيغْ نُحُوبَا رَبِّي أَرْنَسْكَارْ سَ لُوصِيَاتْ نَسْ. ³ أَشْكُو تَايِرِي نْ رَبِّي إِيكَاتْ: إِيغْ أُنْسْكَارْ سَ لُوصِيَاتْ نَسْ. دُ لُوصِيَاتْ نَسْ أُوْرْ ژْضَايْنْتْ، ⁴ أَشْكُو كُولْ مَادْ إِيْلَوْلَانْ غَ دَارْ رَبِّي أَرْ إِيْتَرُو دُونِيْتْ. أَيْلِي سَ أُنْتَرُو دُونِيْتْ إِيكَاتْ: لِيْمَانْ نَخْ. ⁵ مَانُوا إِيْتَرُونْ دُونِيْتْ أَيْلَا وَنَا يُومَنْ إِرْدُ يَسُوعْ لَمْسِيخْ أَيْكَانْ يِوسْ نْ رَبِّي؟

⁶ يَسُوعْ لَمْسِيخْ أَيْكَانْ وَلِيْدُ يِوشْكَانْ سَ وَمَانْ دُ إِدَامَنْ. أُوْرْدُ أَمَانْ كَا وَحْدُوتَنْ أَدْ يِوي، وَلَايْنِي أَدْ يِوي دُ وَمَانْ دُ إِدَامَنْ. دُ رُوحْ نَتَّانْ أَيْكَانْ تُوْكََا إِسْ إِنْصَا مِيَادْ، أَشْكُو رُوحْ نْ لَحَقْ أَيْكََا. ⁷ أَشْكُو وَلِي يَكْنِيْنْ تُوْكََا غَ إِيكَتُونْ كَانْ كَرَاَضْ: بَابَانْتَخْ، دُ وَوَالْ نَسْ، دُ رُوحْ لَقْدُسْ. كَرَاَضْ أَدْ يَانْ أَدْ كَانْ. ⁸ وَلِي يَكْنِيْنْ تُوْكََا غَ وَكَالْ كَانْ كَرَاَضْ: رُوحْ، دُ وَمَانْ، دُ إِدَامَنْ. كَرَاَضْ أَدْ يَانْ أَدْ كَانْ. ⁹ إِيغْ أُنْتَقَبَالْ تُوْكََا نْ مَدَنْ، هَانْ تُوْكََا نْ رَبِّي أَيْمُقُورَنْ، أَشْكُو خَتِيْدْ أَيْكَانْ تُوْكََا نْ رَبِّي لِي يِفْكََا فْ يِوسْ. ¹⁰ وَنَا يُومَنْ سَ يِوسْ نْ رَبِّي هَانْ إِقْبَلْ تُوْكََا أَدْ غَ وُولْ نَسْ. وَنَا أُوْرْ يُومَنْ رَبِّي، هَانْ إِيكَاتْ دُ بُوِيكَرْكَاسْ، أَشْكُو أُوْرْ يُومَنْ تُوْكََا لِي يِفْكََا رَبِّي فْ يِوسْ. ¹¹ خَتِيْدْ أَيْكَانْ تُوْكََا: رَبِّي يِفْكََايَاخْ تُوْدَرْتْ إِيومَنْ، تُوْدَرْتْ أَدْ تَلَا غَ يِوسْ. ¹² وَنَا دَارْ إِيْلَا يِوسْ نْ رَبِّي هَانْ تَلَا دَارْسْ تُوْدَرْتْ أَنْ، وَنَا دَارْ أُوْرْ إِيْلِي يِوسْ نْ رَبِّي هَانْ أُوْرْ دَارْسْ تَلِي تُوْدَرْتْ أَنْ.

¹³ أَرْ أُوَيْنْ تَرَاخْ مِيَادْ كْنِي لِي أُمْنِيْنْ سَ إِيْسَمْ نْ يِوسْ نْ رَبِّي، أُنْيِيْسَانْمْ إِسْ دَرُونْ تَلَا تُوْدَرْتْ إِيومَنْ، تَامَنْمْ سَ يِوسْ نْ رَبِّي. ¹⁴ نَكْنِي نُومَنْ غَ رَبِّي: إِيغْ أَسْ نَضَالْبْ كَرَا نْ تَغُوسَا لِيْدْ إِمْشُوشْكَانْ دُ أَيْلِي يِرَا، أَرَاخْ إِيْسْفَلِيْدْ. ¹⁵ دُ إِيغْ نَسَنْ إِسْ أَيْخْ إِيْسْفَلِيْدْ غَ كُولْ مَائِيْسْ نَضَالْبْ، نَسَنْ إِسْ نِيْتْ دَارْنَخْ إِيْلَا أَيْلِي يَاسْ نَضَالْبْ. ¹⁶ إِيغْ إِرْزَا كَرَا نْ يَانْ كِتُونْ كَرَا نْ كَمَاسْ أَرْ إِيْسْكَارْ كَرَا نْ لَمْعُصِيْتْ أُوْرْ إِيْتُوَيْنْ سَ لُمُوتْ، إِيْضَالْبْ إِرْبِي أَدَاسْ إِيْفْكَ تُوْدَرْتْ إِيغْ أُوْرْ تُوِي لَمْعُصِيْتْ نَسْ لِي يِيْسْكَارْ سَ لُمُوتْ. أَشْكُو تَلَا لَمْعُصِيْتْ إِيْتُوَيْنْ سَ لُمُوتْ. وَلِيْتْ إِيْسْكَارَنْ أَفْلَاسْ أُوْرْ تَضَالْبَمْ رَبِّي. ¹⁷ كُولْ مَائِيْكَانْ دُنُوبْ هَانْ لَمْعُصِيْتْ أَيْكََا، مِشْ أُوْرْ أَكْلُو تُوِيْنْتْ لَمْعُصِيَاتْ سَ لُمُوتْ. ¹⁸ نَكْنِي نَسَنْ إِرْدُ كُولْ مَادْ إِيْلَوْلَانْ غَ دَارْ رَبِّي إِسْ أُوْرْ إِيْتَعُصُو، أَشْكُو يِوسْ نْ رَبِّي أَرْتْ إِيْتَضُوفْ أَنْ سَرَسْ أُوْرْ إِيْكَ إِيْلِيْسْ أَفُوسْ. ¹⁹ نَسَنْ إِرْدُ وِيْنْ رَبِّي أَنْكََا، دُ دُونِيْتْ

كُلُوتَ تَلَّا غُ دُو أُوْفُوسَ نْ إِبْلِيسَ. ²⁰ نِيسَّانْ إِسْدُ يُوْشْكَا يُوْسَ نْ رِبِّي إِرْزَمَ لَعَقْلَ نَحْ أَنْيْسَّانْ رِبِّي إِحْقَاقَنْ.
نُكْنِي نَگَا وِينْ رِبِّي إِحْقَاقَنْ أَشْكَوْ نُمُونْ دَ يُوْسَ يَسُوْعَ لِمَسِيحْ. نَتَّانْ أَيْگَانْ رِبِّي إِحْقَاقَنْ إِگْ تُوْدِرْتْ إِدُومَنْ.
²¹ إِتِّيَاتْ أَتَرُوا نُوْ غُ لَاصَنَامْ. آمِينْ